

ANG

PAHAYAGAN NG PARTIDO KOMUNISTA NG PILIPINAS
PINAPATNUBAYAN NG
MARXISMO-LENINISMO-MAOISMO



Bayan

Ispisyal nga Isyu

Edisyong Bisaya

Oktubre 14, 2000

Hugnuon ang reaksyunaryong rehimeng US-Estrada, pakaylapon ug pasubsubon ang rebolusyon!

Pahayag sa Komiteng Tigpatuman-Komite Sentral
Partido Komunista sa Pilipinas



U sa ka hingpit nga krisis sa pulitika ang giwasdak sa panagsungi tali sa nangulong pahuy nga si Joseph Estrada ug ang iyahang daang sagabay sa krimen nga si Luis “Chavit” Singson. Ang pagbutyag sa raket sa proteksyon sa huweteng nga gipadagan ni Estrada gikan sa Malakanyang, mauy lumbus nga nagbutyag sa nagsampiray nga reaksyunaryong rehimeng US-Estrada ug nagtukmud dinhi sa bung-aw sa padayong pagkahugno.

Gimantala sa Komite Sentral sa Partido Komunista sa Pilipinas

Lumbus nga nabutyag ang dili kaduha-duhaang kroni-ismo, kriminalidad ug pagpangawat nga nanghawud sa pinakapungkay sa baklag nga estadong neokolonyal. Usâ niini, walá'g tuo na ang pagmakmak sa rehimeng pahuy bunga sa padayon nga pagkahugno sa ekonomiya, nagtungtung-patung nga mga iskandalo, binaga'g nawong nga pag-pangabuso sa gahum sa mga pamilyang Estrada ug sa iyang mga kumpare, pakigkunsabuhay sa mga Marcos ug mga kroni ni Marcos, pagpasubsub sa kontra-rebolusyonaryong gubat ug pagligis sa hisgutanang kalinaw sa NDFP-GRP ug dayon sa MILF-GRP, nagkasayup-sayup nga pagdumala sa *hostage crisis* nga gamâ sa Abu Sayyaf, makaylaponng pagyatak sa mga tawhanong katungud ug daghan pang uban.

Kung padayon pang mapalus sa kamut ni Estrada ang kontrol sa sitwasyon, lauman ang mas nagakadako pa nga pagpangilabut sa US

Punting kini karon sa kasilag ug kasuko sa katawhan ug pagsukol sa halapad kaayo nga han-ay sa mga pwersa gikan sa walá hangtud sa tuo. Tataw nga hisgutanang pangpulitika karon ang pagtangtang niini sa gahum.

Ang pagmagahi sa poder sa pundok ni Estrada luyo sa ilahang hingpit nga pagkabutyag ug pagkahimulag, mauy dugang nagpadako ug nagpasubsub sa panangbangi tali sa mga reaksyunaryong pro- ug anti-Estrada. Dinagkong pagbalasa ang nanghitabo sa linumbayay sa mga reaksyunaryong paksyon, pinig-utay ang pag-inilugay ug suporta, dinabu-dabuhay ang mga maniubra ug kontra-maniubra. Alang kang Estrada ug mga nag-unang alagad niya, nasung-ad sa pakigsangka dili lamang ang ilahang kapalaran sa pulitika kundili bisan ang pag-atubang sa mga tubagunung kriminal ug mamahimong lakip ang kaugalingong kasiguruhan.

Ilabina nga gigamit sa nagharing pundok

ni Estrada ang tanang mga pamaaging linimpyo ug hinugaw aron masalbar ang kaugalingon ug makapanimalus, ang panag-away sa mga reaksyunaryo, mauy dili mahimong magpabilin lamang sa sulud sa reaksyunaryong parlamento. Anaa sa sentro sa mga makauulaw'ng katampalasan (iskandalo), gimbuhatong kriminal ug maniubrang paksyunal ang tag-as nga mga upisyal sa PNP ug AFP. Usâ pa mahitabo ang pagbutyag ni Singson, binagaay'g nawong na nga gigamit ang mga ahensyang paniktik batok sa mga karaybal ni Estrada sa pulitika ug ingon usab sa mga panag-away sulud sa Malakanyang.

Ang eleksyong 2001, bisan nga madayon, ug ang pakigsangka sa pagpalagput kang Estrada, dili kalikayan nga magkalambid-lambid ug dugang pang magpasubsub ug magpayamukat sa isi'g usa. Ingon man usab, ang grabi kaayo nga mga problema sa ekonomiya ug kaguliyang sa pulitika nga nagpadayon ug mas paspas pa nga misamut, mauy wala na makahulat sa eleksyong presidensyal sa 2004.

Wala mahamutang ang lokal nga dagkong burgesyang kumprador ug hut-ong agalong yutaan, ingon man sa mga langyaw'ng mamuhunan. Pruyba ang paspas ug padayon nga paghugno sa *stock market* ug bili sa piso. Tanang nag-unang sekta sa relihiyon gawas sa El Shaddai, nanawagan na sa pagpaluwat kang Estrada.

Nagil-asan ang imperyalismong US sa krisis. Sayo kini nga milihuk aron tukuran ang nagsusapinday'ng neokolonya niya ug mangandam sa dugang pagsamut sa krisis. Human naggukud ang mga diplomat sa US og konsultasyon kang Gloria Arroyo, wala magdugay, miluwat sa gabinete ang naulahi. Kung padayon pang mapalus sa kamut ni Estrada ang kontrol sa sitwasyon, lauman ang mas nagakadako pa nga pagpangilabut sa US aron sulbaron ang krisis sa pulitika, malagmit pinaagi sa pagpwersa sa pagparisayn kang Estrada o pagpatawag og *snap election*.

Nasilag ang katawhan sa walay pugong nga paglubuk sa krisis sa ekonomiya. Paspas nga

migrabi ang pag-ilaid, kapit-us sa mga nag-unang panginahanglan, disempleyo, pagusbaw sa mga presyo sa palaliton, pagpanamastamas sa mga demokratikong katungud, makaylapong pagpabakwit sa kabukiran ug kasyudaran, dayag nga pagpaharuhay sa mga anaa sa gahum ug

demokratiko ang pagpalagput niini. Karon, anaa sa maayong pusisyon ang Partido ug rebolusyonaryong kalihukan aron labaw'ng papas pa nga palapdon ug paasdangon ug danihon ang minilyong katawhan alang sa rebolusyon. Dinhi nagsukad ang pag-asdang sa rebolusyon sa mas taas nga ang-ang.

Ang Partido ug mga rebolusyonaryong pwersa, mauy anaa sa kinaunhan sa pakigbisog aron hugnuon ang reaksyunaryong nagharing rehimeng Estrada.

pagpanghawud sa mga langyaw'ng monopolyo. Sa kalisud sa kinabuhi ug sa kagrabihun sa pagpanglupig, ang yanong katawhan miliwag sa mga protesta sa karsada, sa pakigbisog ug sa pagsuporta sa rebolusyonaryong kalihukan.

Ang Partido ug mga rebolusyonaryong pwersa, mauy anaa sa kinaunhan sa pakigbisog aron hugnuon ang reaksyunaryong nagharing rehimeng Estrada. Bunga sa Ikaduhang Bantugang Kalihukang Pagtul-id, mas lig-on ang pundasyon ug uyuk sa rebolusyonaryong kalihukan. Sa niaging pipila ka tuig, padayon nga nagakalapad ug nagakasubsub ang gerilyang pakiggubat ug mga masang pakigbisog nagsukad sa kaugalingong katakus. Nagmadaugon ang rebolusyonaryong kalihukan bisan sa lisud kaayong kahimtang ug lumbus ang kalig-ong gipabiling nagdilaab ang masuklanong diwa sa katawhan.

Sukad pa niadto, pursigidong gibutyag ug gipakigbatukan sa mga rebolusyonaryong pwersa ang lunud-patay'ng reaksyunaryong paghari sa rehimeng US-Estrada. Dihang paspas nga nabutyag ug nahimulag bunga sa pakigkunsabuhay sa mga Marcos, pusut-pusut nga mga iskandalo ug militaristang pagpangligis sa hisgutanan kalinaw aron pasubsubon ang kontra-rebolusyonaryong gubat, direktang gipanawagan sa mga pwersang nasudnon-

Pangkinatibuk-ang katungdanan sa Partido ug tanang rebolusyonaryong pwersa sa kasamtangang sitwasyon nga kutub-sa-maabut, pasubsubon ang pakigbisog aron lumpagon ang reaksyunaryong rehimeng Estrada ug mapangahason nga ipaasdang ang rebolusyon sa nagkalain-laing nataran ug linangkuban.

Magkatakdo nga katungdanan ang pagkonsentra og mga suntok sa nagharing rehimeng pahuy ug ang pagpaasdang sa rebolusyon. Gihugop nato ang suntok sa pinakahigtin nga lunud-patay'ng reaksyunaryong target ug naningkamut kita nga makigtinabangay sa nagkalain-laing ang-ang ug pamaagi sa pinakalapad nga posibleng han-ay sa mga pwersang anti-Estrada. Duyug niini, lig-on natong gipasiugda ang linya sa demokratikong rebolusyon sa katawhan ug gipakusug kutub-sa-mahimo ang mga progresibong pwersa.

Sa tudong pagpasubsub sa pakigbisog sa reaksyunaryong rehimeng US-Estrada, katuyuan natong padilaabon pa ug pahimuslan ang mga panag-away sa mga reaksyunaryo ug inang-ang nga pahinayon ang reaksyunaryong gahum sa

Dakong kasaypanan sa ingon niining kahimtang ang magpakasarang sa daang pig-ut nga linangkuban ug mga naandang gawi ug magmaduha-duhaon.

kinatibuk-an. Duyug niini, gipakusug nato ang mga rebolusyonaryong pwersa sa nagkalain-laing dagway ug nataran sa pakigbisog-naggikan sa armado ug ilegal taman sa parlamentaryo ug ligal.

Sa kahimtang sa grabihan kaayong krisis,

pinakamahinungdanon alang sa mga rebolusyonaryong pwersa nga makiglambigit sa pinakalapad nga masa sa pinakapaspas nga pamaagi ug panguluhan ang ilahang pakigbisog aron labaw pang palapdon kadto ug gabayan ngadto sa rebolusyonaryong direksyon.

Magpalapad duyug sa pagpasubsub; magpasubsub aron magpalapad ug magpakusug. Pahimuslan ang kainiton sa katawhan ug ang kaguliyang sa mga reaksyunaryo, pasubsubon ang armadong pakigbisog ug mga masang pakigbisog. Sa ingon niining pamaagi, epektibong mapanguluhan ang masa, madani sila nga mangahas nga makigbatok ug dinaghang maagni alang sa rebolusyon.

Dakong kasaypanan sa ingon niining kahimtang ang magpakasarang sa daang pigut nga linangkuban ug mga naandang gawi ug magmaduha-duhaon. Mapangahason nga magmartsa sa unahan sa katawhan.

Musunud ang mga nag-unang katungdanan sa Partido sa kasamtangang sitwasyon:

1 ILUNGSAD ANG MGA TAKTIKAL NGA OPENSIBA UG PASUBSUBON ANG ARMADONG PAKIGBISOG.

Pabayron ang reaksyunaryong rehimeng US-Estrada sa tumang pagpaantus sa nasud ug katawhan gamâ sa pagpalakat nga subrang antinasyunal, antikatawhan, anti-demokratiko ug kabaklagan. Ang mga desperadong maniubra aron magpabilin sa gahum, mauy walay kapadulngan kundili ang dugang nga lalum nga pagkalubung sa krisis ug labaw pang grabing pagpaantus sa katawhan. Ang mga taktikal nga opensiba, mauy pinakagrabing laparus nga mamahimong buhian sa katawhan. Kinahanglan niini aron tibhangon ang paghuput nila sa gahum ug agnihon ang tudong pakigsangka sa tanang pwersang

progresibo ug anti-Estrada.

Kinahanglan ang kaylap nga mga taktikal nga opensiba aron makapaigô og makawiwigig nga suntok sa reaksyunaryong rehimeng US-Estrada ug makatigum og mas daghan pang armas ug uban pang kagamitang militar. Kinahanglan niini aron makabukas og mas daghan pang natarang gerilya ug pakusgon ang mga napundar na.

Ingon man, kinahanglan ang dugang pagpaningkamut aron maglungsad og mga aksyong militar nga adunay kusug nga epektong pangpulitika, nagpataas sa morale sa masa ug nagmugna og mas dakong kaudat ug kaguliyang sa mga kaaway sa katawhan. Angay nga masakup ig-an ang dagko ug hilabihang gikasilagang mga kaaway sa katawhan ug mga simbolo sa reaksyunaryong gahum.

2 PASUBSUBON ANG MGA PROTESTA UG MASANG PAKIGBISOG

Maglamsad og mga higanteng aksyong protesta sa mga karsada ug pakaylapon kini sa entero kapupud-an. Gamiton ang mga taktikang alyansa aron makatigum og mga numero nga makapukan sa pagpanghikut ug kwarta sa nagharing rehimen. Mahukmanon kini sa paggupuk sa nagpabilin pang suporta sa nagharing rehimen ug pagdani sa mga nagduha-duha.

Gawas sa mga protestang masa aron palagputon si Estrada, palapdon ug pasubsubon ang uban pang pakigbisog pangpulitika ug pang-ekonomiya sa katawhan. Tubagon ang mga nag-unang kayagutgut sa panginabuhian ug pulitika sa masang mamumuo, mag-uuma ug uban pang kabus nga sektor aron makaylapon mapukaw ug mapalihuk sila.

Hatagan og partikular nga pagtagad ang pagbutyag ug pagmakmak sa makaylapon nga mga pagpanamastamas sa mga demokratikong katungud ug mga tawhanong katungud. Samtang nagakasubsub ang

panagsangka ug labaw'ng nahimong desperado ang reaksyunaryong nagharing rehimen, labaw pa sila nga mupaling sa pasismo ug pagpasubsub og pagpanumpo sa katawhang nakigbatok.

Mapangahasong palapdon ang mga nasudnon-demokratikong organisasyong masa sa dayag ug tago. Duyug niini, magpalutaw ug magpalambo og dugang nga mga tipo sa organisasyon nga mas paspas nga makaabut sa yanong katawhan ug makalambigit kanila sa relatibong abanti nga mga elementong anaa sa mga organisasyong nasudnon-demokratiko. Ayaw pagpakasarang sa tutagidyung organisasyon ug inaginud nga pag-organisa.

3 PALAPDON UG PADASIGON ANG MGA KAMPANYANG ANTIPYUDAL UG UBAN PANG KAMPANYANG MASA SA KABUKIRAN DUYUG SA PAGPASUBSUB SA GERILYANG PAKIGGUBAT.

Pursigidong palapdon ang mga kampanya ug masang pakigbisog, nag-una ang mga kampanyang antipyudal, aron palig-unon ug palawumon ang baseng masa. Pakaylapon ang kampanya sa pagpatuman sa minimum nga programa sa rebolusyonaryong reporma sa yuta, ingon man ang mga kampanya sa edukasyon, organisasyon, kultura, panglawas ug uban pa.

Sulbaron ang mga problema sa inaginud nga pag-organisa ug kinatag-katag nga pagpalihuk sa masa. Ipakaylap ug ipatuman ang mga gabay sa KPKS sa pagpatulin sa pag-organisa sa kabukiran. Palambuon ang mga haum nga ligal nga dagway sa organisasyon ug pakigbisog alang sa pagpahagurus sa pagpalapad ug pagpalig-on sa baseng masa.

Sa mga pinakaabanti nga bahin, tukuron ang mga hingpit nga kapunungang masa, mga organo sa gahum pangpulitika, mga yunit sa milisya sa katawhan ug mga grupo sa pagpanalipud-sa-kaugalingon ug mga sanga ug grupo sa Partido.

4 MAPANGAHASON NGA PALAPDON ANG MGA PAKIGLAMBIGIT UG MAGPAKAHANAS SA MGA TAKTIKANG NAGKAHIUSANG PRENTE.

Kinahanglang abton, pukawon ug pali-hukon ang minilyong katawhan ug dili kini mahimo kung dili mugamit ug magpakahanas sa mga taktikang nagkahiusang prente. Makiglambigit sa pinakalapad nga posibleng han-ay sa mga aktwal ug potensyal nga alyadong pangmalahutayon ug panghinanali, masaligan ug dili masaligan. Gamiton ang mga taktikang nagkahiusang prente aron ihimulag ang pipila, danihon ang kadaghanan ug pukawon ang halapad nga masa. Pahimuslan ang mga panagbangi sa mga reaksyunaryo aron lumbus nga ihimulag ang nagharing pundok ni Estrada ug padayon nga dugang pang pahinayon kini taman sa katapusang pagkahugno.

Ang kasamtangang han-ay sa mga pwersang anti-Estrada, mauy labaw'ng katag-katag ug labaw'ng nagkadaiya pa ang baruganan kung itandi sa halapad nga prenteng anti-diktadurya batok sa pasistang diktaduryang US-Marcos. Magpakahanas sa pagtukud og mga pakiglambigit nga *bilateral* ug *multilateral*, direkta ug dili direkta, pormal ug dili pormal, relatibong istabli ug tumang nagpaling-paling, halapad ug hangtud partikular nga isyu lamang, sa natarang dayag ug tago, sa gawas ug sulud sa reaksyunaryong parlamento-alang sa kapuslanan ug segun sa kahimtang ug katakus sa isi'g usa. Ang mahinungdanon, magpakahanas sa pakigtinabangay sa pinakalapad nga posibleng han-ay aron pangibabwan ang atong limitasyon ug paspas nga muasdang. Duyug niini, hugut nga huptan ang kaugalingong mga rebolusyonaryong prinsipyo ug linya ug mapalimbisugon nga pakusgon ang mga progresibong pwersa aron makalahutay nga magkaugalingon bisan pa'g mubali ang mga alyadong panamtang ug dili masaligan o bin mugrabi ang atong pakigbangi kanila.

Kinahanglang padayon usab natong ibutyag sa katawhan ang pipila ka grupo sa kontra-rebolusyonaryong traydor nga nagpamarug nga mas walá pa sa mga tiunay'ng walá aron idutdut ang kaugalingon, ilaron ang masa ug taptapan ang ilahang rebisyunismo, repormismo ug parlamentarismo. Samtang mas nagkapulikî sa pagsabwag og hiló ug labaw'ng interesado sa pagpanggubut ug pagpanggun-ub batok sa Partido ug kalihukan, kining pipila ka pudyut nga grupo, dili angay'ng pasagdang makapahimulus sa mga gikabudlayan nato aron lamang makapaaron-ingnon ug makapagubut kanato.

Mahinungdanong bahin sa halapad nga gimbuhatong alyansa ang pagpalambo sa gimbuhaton sa sulud sa reaksyunaryong institusyon sama sa burukrasya, simbahan, *mass media*, parlamento ug eleksyon. Kinahanglan nga palapdon kini sa nagkalain-laing ang-ang ug gamiton sa pagpalapad sa maniubra ug pakiglambigit sa masa samtang gitudlo kanila ang kinaiyanhong limitasyon niini.

5 PALAPDON ANG GIMBUHATONG PROPAGANDA UG EDUKASYONG PANG-PULITIKA

Palapdon ang gimbuhatong propaganda ug edukasyon pangpulitika aron patas-on ang kahimatngong pangpulitika sa katawhan ug maksimisahon ang hinanali ug malahutayong kapuslanan sa rebolusyon sa mga gilungsad nga pakigbisog. Hatagan og partikular nga pagtagad ang mga pamaagi sa propaganda ug edukasyong pangpulitika nga labaw'ng paspas nga makaabot sa labaw'ng daghang ihap sa masa, sama sa mga pangmasang

panagtigum, brodkas sa radyo, mga salida nga *video* ug uban pa. Magtudlo og mga tigpamâbâ ug tiglambigit aron maksimisahon ang paggamit sa wanang, bisan unsa pa man kapit-us, sa ligal nga *mass media* samtang gipalambo ang kaugalingong makinarya ug katakus. Magpalutaw ug magbansay og dakong ihap sa propagandista ug instruktur sa kalihukang tago ug dayag.

6 MAPANGAHASON NGA PALAPDON ANG PARTIDO NGA DILI TUGUTAN NGA MAKALUSUT NI USA KA DAUTANG ELEMENTO.

Sistematikong rekruton sa Partido ang mga pinakaabanti nga elemento nga milutaw sa han-ay sa masa. Kinahanglan nga adunay mga plano sa pagrekrut sa matag takdang panahon ug sa nagkalain-laing linangkuban aron madasigon nga palapdon ang organisasyon sa Partido. Kinahanglan nga magrekrut og libuan ug gatusan ka libong membro ug magbansay og libuang kadre aron labaw'ng pakusgon ang Partido ug andamon kini sa labaw'ng bug-at pang gimbuhaton sa rebolusyon.

Padayon nga misubsub ang pakig-sangka ug kinahanglang kanunay'ng mabinantayon sa labaw'ng grabing pagpa-ngataki sa reaksyunaryong kaaway. Angay nga walay puas nga palapdon ug palawumon ang kalihukang tago sa kabukiran ug kasyudaran. Padayon nga pakusgon usab ang makinarya ug katakus sa pinansya ug hugut nga ipasiugda ang istilo sa simpleng panginabuhi ug mapalimbasugong pakigbisog aron mahûhû ang tanang katakus sa pagpaaslang sa armadong rebolusyon. **AB**